

Date – 08/03/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Vice President Pu C.P. Radhakrishnan chuan thalaite chu hna zawngtu nih ngawt tum lova, a siam saktu nih tum tur leh, remchanna zawngtu aia siam saktu nih tum turin a fuih.
2. Chief Minister Pu Lalduhoma chuan nimin khan Mizoram Engineering College chu kumin atangin class tan tum a nih thu leh Mizoram State University kalpui tura hmalak zel a nih thu a sawi.
3. PWD Minister Pu Vanlalhlana chuan Durtlang North-a Multipurpose Indoor Hall sak thar hawnna chu khuallian niin a hmanpui.
4. Prime Minister Narendra Modi chuan India ramah airport 70 vel awmin, tunah chuan 160 chuang a awm tawh thu a sawi.

<><><>

VICE PRESIDENT

Vice President Pu C.P. Radhakrishnan chuan thalaite chu hna zawngtu nih ngawt tum lova, a siam saktu nih tum tur leh, remchanna zawngtu aia siam saktu nih tum turin a fuih.

Nimin khan Mizoram University (MZU) Convocation vawi 20-na chu MZU Campus-a Multipurpose Hall-ah hman a ni a, he huna khuallian Vice President chuan Hmarchhak state te'n theihna nasa tak an nei tih sawiin, thalaite hmelma lian ruihhlo erawh nasa zawka do tlan a tul tih a sawi a. Zirlaite chu a eng zawnga hmalam thlir turte, tunlai thiamna chhuak thar apiang thiam bel tum turte, hun vawng dik tur leh social media hman chin tawk hre turte in a chah a. India rama ziak leh chhiar thiam tamna ber leh a ram zau zawng atanga teha ramngaw nei tha a ni chu chhuanawm a tih thu sawiin, thalaite chu hmasawanna tlo leh ngelnghet, chhehvela thil awmte tibuai lo zawnga hma la turin a fuih bawk a ni.

MZU Convocation-ah hian MZU hnuaia zirlai 6385 te hnenah degree hlan a ni a. Vawiina inlan (candidates receiving degrees in person) 1113 zinga Doctor of Philosophy 147, Master of Philosophy 3, Master's Degree 486, Master's Professional 137, Bachelor's Degree 121, Bachelor's Professional 174, Gold Medalist 43 leh Book Prize dawngtu 2 te kutah degree leh lawmman hlan a ni.

<><><>

CM

Chief Minister Pu Lalduhoma chuan nimin khan Mizoram Engineering College chu kumin atangin class tan tum a nih thu leh Mizoram State University kalpui tura hmalak zel a nih thu a sawi.

MZU Convocation-a hmanpuinaah Pu Lalduhoma chuan, Mizoram sawrkar flagship scheme Handholding chu thalai, mahni kea ding tura theihna leh thiamna neite tana buatsaih a nih thu sawiin, scheme hmang tangkai turin thalaite a sawm a. University naupangte ni chung a Mizoram University-in NIFR 2025 ranking-ah India rama University tha 82-na a hauh pha chu chhuanawm tiin, hetiang dinhmun thleng thei tura thawktu zawng zawngte chungah lawmthu a sawi a, an kalzelna turah duhsakna a hlan a ni.

Mizoram University hi kum 2001 khan din niin, tun dinhmunah Department 39 a awm a. Centre 2 te'n School of Study 10 ah UG, PG leh Ph.D programme an kalpui mek a. Affiliated College 40 leh Constituent College 1 a nei mek bawk.

<><><>

PWD MINISTER & SPORTS MINISTER

Public Works Department (PWD) Minister Pu Vanlalhlana chuan Durtlang North-a Multipurpose Indoor Hall sak thar hawna chu khuallian niin a hmanpui a. Sports & Youth Services (S&YS) Department Minister Pu Lalnghinglova Hmar chu khualzahawm a ni.

Nimina hun hmanah hian PWD Minister chuan, Hall chu thalaite tana sawrkar inpekna leh talent nei thate chher chhuah a tumna a lantir a ni tih sawiin, Hall chu Mizo thalaite international leh national level inelna a tel phak khawpa chhertu a nih theih nan duhsakna a hlan a ni.

Khualzahawm Pu Lalnghinglova Hmar chuan Mizoram pum dapchhuaka thalaite talent hai chhuahna tura sawrkar hmalakna 'Empowering Mizoram Sports' chu hmang tangkai turin kalkhawmte a fuih a, naupangte talent haichhuah nan veng tinin an veng a naupangte infiamna chi hrang hranga training pe turin zirtirtu (coach) a thlawnin an ko thei a ni tih a tarlang bawk.

Multipurpose Indoor Hall hi a dung lam metre 46 niin, a vang zawng metre 20 a ni a, a Hall san zawng hi metre 9 nii, a chung sang lai ber hi metre 12 a ni. Indoor Sports Discipline hrang hrangte hman theih turin a chhuat pawh 7 mm-a chhah PVC Vinyl Sports Flooring phah chhuah vek a ni a. Volleyball Net pole leh Net dah tel a nih bakah, building hmalam tualzawl pawh PCC Flooring-a siam nghal a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KOHRAN HMEICHHIA

Mizoram Presbyterian Kohhran Hmeichhe Inkhawmpuilian Rorel Inkhawm wawi 13-na chu Champhai Vengthlang Presbyterian kohhran Biak Inah neih mek a ni.

Nimin khan Palai atana thlan mi mi 1049 ten nilengin ro an rel a, kum 2028-a Rorel Inkhawm vawi 14-na chu Sihphir ah March ni 10 atanga ni 12 chhungin neih a ni ang.

Kumin rorel inkhawmpui atana thupui chu 'Sim rawh u, vanram chu a hnai tawh e (Matthia 4:17)' tih a niin nizan inkhawmah Synod Moderator, Rev. John Raldosanga'n Pathian thuchah a sawi a, vawiin atangin Inkhawmpui pual thupui tlawhchhanin thupui sawi tura ruat - Rev. Remlalfaka, Secretary, BSI Aizawl Auxiliary in inkhawm apiangin thu a sawi thin tawh dawn a ni.

Tun dinhmunah Mizoram Presbyterian kohhran Hmeichhe inchhiarna atanga a lan danin Pastor bial leh kohhran mala zawmtu 223 awm mekin Kohhran Hmeichhe member mi 2,08,921 an ni a, Pastor bial te zingah Champhai Vengthlang Pastor bial chu member tam berna an niin member 3122 an awm a, Buarpu bial chu bial te ber niin member 36 an awm thung a ni.

<><><>

PANG ZIRLAI PAWL

Pang Zirlai Pawl chuan nimin khan an dinchampha vawi 42-na chu Vaṭhuampui, YMA, Hall-ah, Lawngtlai Bawrhsap Pu Donny Lalruatsanga hovin an lawm.

Khuallian, Pu. Donny Lalruatsanga chuan Zirna chu hmasâwnna kawnga kawng pawimawh a nih thu leh, Pang fate chu tun aia zirna kawngah ṭan la zual turin a chah a, Pang Zirlai Pawl chu Zirna kawngah nasa taka ṭan la tur bakah mahni huang lo lakah inthiar fihlim thiam tur leh an pawl dinchhan chu zirna kaihnawih ni se a duhthu a sawi.

He hunah hian Food & Drugs awareness campaign neih ni bawkin, resource person atân Nl. Pc. Lalhmingmawii, Evangelist Nurse chu hman a ni a. Hnam lâm leh Drama hmuhdawm tak tak te en ho a nih bâkah zaithiam tak tak ten zaiin an awi a, rising day pualin tlai lamah ruai an kilho bawk a ni.

<><><>

Airport

Prime Minister Narendra Modi chuan India ramah airport 70 vel awmin , tunah chuan 160 chuang a awm tawh thu a sawi . Boruaka intlawhpawhna tha neih chuan hmasawwnna nasa tak a thlen dawn a ni a ti a. Nimina Kota-Bundi Greenfield Airport thar lungphum puala video message a thawnah Prime Minister chuan kum 2014 hma khan Delhi chhehvela airport eng emaw zat tihhmasawn a nih tawh thu a sawi bawk. PM Modi chuan airport sak a nih hian, a chhehvelah entrepreneurship leh tourism a tichak a, a biala economic activity pawh a ti chak a ni, a ti. Kota Airport hian Kota leh a chhehvel tan hmasawwnna kawng thar a hawng dawn a, thalaite, sumdawngte leh tualchhung economy ten an hlawkpui dawn tih a sawi bawk.

Rajasthan Chief Minister Bhajan Lal Sharma chuan, sorkar chuan a thutiamte chu chak takin a hlen chhuak mek a ni, a ti a. Union Civil Aviation Minister Kinjarapu Ram Mohan Naidu chuan airport project hi kum hnih chhungin zawhfel a nih tur thu leh, thlawhtheihna pawh a thlawh tan thuai tur thu a

sawin, he airport sakna atan hian cheng nuai 1,500 chuang sen a ni dawn a ni a ti.

<><><>